

En conexion cu e detencion di un miembro di prensa

Gobierno no ta y no lo mete nunca den asuntonan di Ministerio Publico

DURANTE conferencia di prensa di Gobierno di Aruba diabierna mainta 11 di october, varios pregunta a wordo haci na Prome Minister Evelyn Wever-Croes. Un di e preguntanan tabata relata n'e detencion di un miembro di prensa, na unda a cuestiona si en realidad Gobierno lo tabata tin influencia riba esaki detencion aki.

Basa riba e pregunta aki, Prome Minister a indica cu esaki ta un tema cu su persona a bin ta wordo tilda p'e na varios ocasion, bisando cu e ta mete den Ministerio Publico (OM). E mandatario a indica cu su personanan ni Gabinete Wever-Croes, no ta, y no lo por mete den asuntonan di OM, mirando cu OM ta un entidad autonomo y independiente.

Pa ilustra esaki, Prome Minister a duna un ehempel di e caso di Glenbert Croes, na unda cu Glenbert no a ricibi e mesun trato cu tempo Marisol Lopez-Tromp a bira sospechoso di husticia na Juni 2021 den porta di eleccion. Na niun momento nan a bati na Marisol su porta cu arma, lant'e for di soño pa deten'e. Sino

nan a yam'e na telefon pe bay bebe un "coffie" cerca nan. Prome Minister a expresa cu si di berdad e por a mete den e asuntonan di OM, hamas e lo a permiti nan duna Glenbert Croes e trato cu nan a dun'e.

Otro ehempel t'e detencion di su mesun yiu homber cu tabata na un restaurant comiendo cu famia. Aki ta unda casa di Gerlien Croes ta drenta, dal su yiu homber di patras y corta su otro yiu cu glas. N'e ocasion aki, husticia ta detene su yiu homber y no esun cu a bin ocasiona e problema. Esaki ta un muestra sigur cu Prome Minister no por y no ta mete den asuntonan di OM, pasobra si esaki tabat'e caso, hamas e lo a permiti nan trata su yiu di e manera aki.

"Manera mi a bisa semper, Ministerio Publico ta un entidad independiente, y nan ta encarga cu nan investigacionnan. Nan ta dicidi ki ora y na unda investigacion y detencion ta wordo haci. Gobierno nunca a mete y no lo mete den Ministerio Publico, y ta duna nan tur espacio pa haci nan investigacion manera mester ta, p'asina husticia prevalece", Prome Minister a expresa.

Pa loke ta retiro di Minister Geoffrey Wever di partido RAIZ

No tin motibo pa descontinua posicion di Minister Wever

Si e tin sosten di su parlamentarionan

DIABIerna mainta durante conferencia di prensa di Gobierno di Aruba, Prome Minister Evelyn Wever-Croes a elabora riba e status di Minister Geoffrey Wever como minister di Gabinete Wever-Croes II, awor cu el a entrega su retiro for di partido RAIZ.

Prome Minister a expresa cu pa su persona e retiro di Minister Wever for di partido RAIZ tabata bisto. Esaki desde e momento cu e parlamentarionan di partido RAIZ a kibra e palabracion cu a wordo haci durante formacion di e coalicion MEP-RAIZ, pa loke ta trata e presidencia di Parlamento.

E mandatario a indica cu pa loke ta e posicion di Minister Wever, el a haya un petition di partijraad di RAIZ, na unda Minister Wever ta inform'e cu partijraad di RAIZ a pidi'e pa keda como minister. Pa cu esaki, Prome Minister a pidi un declaracion por escrito di e dos parlamentarionan, indicando cu nan ta sostene Geoffrey Wever

como minister pa RAIZ, mirando cu e no ta parti di partido RAIZ mas.

Tambe Prome Minister a indica cu na momento cu partido MEP a cera un coalicion cu partido RAIZ, a cera varios acuerdo cu partijraad y lider di partido RAIZ, cu lamentablemente e dos parlamentarionan no ta tene nan mes na dje. Y ta pa e motibo aki, Prome Minister ta pidi un declaracion por escrito, indicando cu nan ta sostene Minister Wever pa representa nan pa cu e resto di e periodo di gobernacion.

Ta importante si pa menciona cu pa ley si un minister tin sosten di mayoria den Parlamento, e lo por keda minister, irrespecto si el a retira di un partido y a join un otro partido, pasobra ta Parlamento tin e ultimo palabra. Den e caso aki si e dos parlamentarionan di RAIZ ta sostene Geoffrey Wever pa keda cu e posicion di minister pa RAIZ, el lo keda como minister.



"Mi no tin motibo pa desconfia den Geoffrey Wever, si mi haya un declaracion cu nan ta sosten'e, nos ta sigui te na final cu ne. Como Minister President mi no tin motibo pa descontinua Minister Wever su posicion di minister, pasobra con cu bay bin economia na Aruba ta bayendo bon, turismo ta bayendo bon y comercio tin confiansa den Gobierno, pues mi no ta kere cu esaki ta momento pa cambia e minister di economia. Pero, na final di dia esaki no ta mi decision. Loke ami como mandatario principal di e pais aki kier, ta tranquilidad pa nos por sigui goberna e resto di e periodo aki", Prome Minister a expresa.